



LVK
2018

CV DE KEVERS
KESSEL

LVK FINALE

Vriedig 26 jannewarie 2018

INHOUDSOPGAAF



01. Inne Sjunne Ruk	14	11. Droeëme mit de oeëge oop	36
02. De leukste vrouluuj zitte in de hel	16	12. Maa Maa Maa Maa	38
03. Òp weg nor maerge	18	13. Noe of nooit	40
04. Weej kleure de waereld	20	14. Is hei 'ne dokter in d'r zaal	42
05. Blieve!	22	15. Veer moge weer (daag en nach)	44
06. De Klaptoesj!	24	16. Ach, dân zien we vânde straot aaf !!!	46
07. Deze Nach!	26	17. 't Lempke van de Keulkas	48
08. Welteruste Waereldj	28	18. De tied vaan us leve!	50
09. Drie daag oet de plaat	30	19. Vastelaovundj Bubbel	52
10. Is 't 'm noe, of is 't 'm neet ?	34	20. Mörge weer	54
Veurwaord Veurzitter LVK	04	De Geliënde (winnaar 2017)	12
Veurwaord Veurzitter Organisatie	06	Scoreformelier Finale	32-33
Veurwaord Burgemeister	08	Publiekssjtumme	56-57
Limburgs volkslied	10	Euverzich winnaars	58-59

42^e LVK FINALE

Vriedig 26 jannewarie

**LVK Paviljoen
Kessel**

Presentasie

Henk Hover

Samesjtelling: **Brigitte van Eck, Stichting LVK**

Vormgaeving: **MediaKracht.com**

Plaetjes: **Fred Janssen**

Drök: **Sync.**

Organisatie 2018:
**CV De Kevers
Kessel**





VEURWAORD VEURZITTER LVK

Joep Verbugt

Veurzitter Stichting LVK



In 2014 ware acht goude, zeve zilvere en nege bronze medaillewinnaars te gast in ut Holland Heineken House in Sotsji tiedes de Olympische Winterspeule in Rusland. 24 minse zurgden der toen veur det ze dao figuurlik oecht ut daak ginge! Figuurlik want letterlik is det met dit Neptunus paviljoen onmeugelik.

Veer jaor later staon 20 kandidate wer in een Neptunus paviljoen klaor um in dit 'Limburg Brand Hoes' gehuldigd te gaon waere as muzikale veurgangers van ozze eige vasteloavend. Auch op hun zien wae trots. En neet allein wae, mer gans Limburg! Want die kieke en loestere allemaol via L1 vanaovend met um te zeen waem met de allerhoëgste olympische vasteloavendmedaille nao hoes moog gaon.

De organisatie is deez kier in hande van CV De Kevers. Sinds 1959 organisere die de vasteloavend in het Kessel-se Keverriek. Dit jaor legge ze de lat un stuk hoëger en organisere ze hiel gaer de LVK-finale aovend vur de ganse provincie. Ze hebbe koste noch meute gespaard um het uch nao de zin te gaon maken. Ein klein durp wurd vanaovend hiel groët!

Veur deez editie heet ut LVK 190 inzendinge ontvange. 48 juryleden hebben op twië zadderdigge in december in Grathem hun best gedaon um het kaf van het koore te sjeie en 130 leedjes aaf te laote valle. De 60 overgebleve halve Finalisten mochte vervolgens veur het ierst optreeje in de Muziekgieterij in Mestreech.

Van die 60 is door de stumme van ut volk twiederde aafgevalle. Met as gevolg 20 hiel bleje en trotse Finaliste. Die staon allemaol te popele um zo dadelik te gaon optreeje en dae felbegeerde Bertha Paulissentrofee straks in ontvangst te moge neme.

Die Twië oet Hulsberg hebben dae trofee dit jaor 'Geliend' umdet ze mit Code 'road-gael-greun' veurig jaor het paviljoen van de Winkbulle in Heele net neet hebben aafgebrooke! Wat waas het Maurice en Jos gegund det ze nao 16 finaleplaatse eindelijk het LVK mochte winne.

Dae trofee steit nao wer op ut podium en wae gaon aan de geng! Hiel veul dank aan iedereen dae dit jaor aan dit fantastisch volksfiës un beejdrage haet geleverd. Ich wins uch eine geweldige aovend heej in het 'Limburg Brand Hoes' en wae houwe op de kis umdet ut veur de 42e kier ein LVK-finale is.

Joep Verbugt

Veurzitter Stichting LVK

VEURWAORD

VEURZITTER

Organisatie

Maurice Vervoort

Veurzitter Stichting LVK Kessel



Leef Vastenaovesvrunj,

Vol trots heit ig ug welkom in Kessel, un klein dörpke aan de Maas wat ônger de gemeinte Peel en Maas velt. Wao de Vastenaovend nog altied bleujt en wao ut ein iër is om Prins of Adjudant te moge zien.

Wao weeï nog altied ôs eigen liedjeskonkoers, ut Les Artistes Krômme Gölde Konkoer hubbe.

De kweekviever van de Kesselse Vastenaovesmeziek!

5 Jaor geleeje sjtônge weeï, ôngergeteikende en Jos Notermans, aan de bar bieï ut 75-jaorig jubileum van Neptunus. Aug nog op de plek wao we noe sjtaon notabene!

“Zulle we probere ut LVK nao Kessel te haole?”, bespraoke weeï dao met zien twiëje. Idderein verklaorde ôs veur gek!

Noë, 5 jaor later, sjtaon weeï d'r den! Ich zeen ut as un groëte iër dit jaor veurzitter te moge zien van zôn geweldig Vastenaovesfestijn.

Kessel luüt zich van ziene beste kantj zeen! Weeï as stuurgroep, de kopmannen en -vrouwen met de miense in de negen commissies, weeï zien super trots. Samen berge verzet: elke waek same euverlegge, sjpannende keuzes make en samen de sjouwers d'r ônger, zoë hubbe weeï dit fiës veur elkaar gekregel!

Vandaag gaon hieï de 20 sjoenste en beste Vastenaovesliedjes sjtrijden om de groëtste iër: “Winnaar van ut LVK Kessel 2018”

Laot os same ein fiës bouwe vandaag, erm aan erm, sjouwer aan sjouwer en wengske aan wengske, en fiëste det ut daak d'r aaf geit, det weeï de Sterre zeen straole en det de nach nog lank is!!

Leef Vastenaovesvrunj, artiesten, sponsors en zeker de vrieuwilligers, super bedankt veur wat geeï gedaon hubt en noë: Fiëste, fiëste, geniete en nog uns geniete.

HIEÏ WIL SE BIEÏ ZIEN!!

Maurice Vervoort

Veurzitter Stichting LVK Kessel 2018

VEURWAORD BURGEMEISTER

Wilma Delissen-van Tongerlo

Burgemeester van Peel en Maas



UT IS FIËS IN KESSEL

Ut groëte Limburgs Vastelaovesleedjes Konkoer 2018 is dit jaor neergesjtreeke in os sjoëne Maasdorp Kessel. Ich bun biezonzjer trots op de inwoeners van Kessel det zeej de oetdaging met beide henj hubbe aangegrepe. En ich weit zeker det ze gaon knalle!

In Kessel weite ze altied aan idderein ein gastvriej welkom te beeje. Zeker as ut geit om ut viere van vastenaovend. Naeve heur eige "Krömme Gölde Konkoer" gaon ze ut dit jaor wat groëter aanpakke met ut LVK. Chapeau!

Mascotte Joepie is hiel Limburg doorgereisd en haet "os" LVK letterlijk oppe kaart gezat. Altied sjtrak in ut pak en met eine groete sjmile en ein dansje.

De 20 Finaliste die door zien weite te dringe veur de finale zulle zeker sjtaon te popele om heur liedjes ten gehuure te bringe. De organisatie haet der alles aan gedaon om heur ein sjoën podium en ein werm geveul in Kessel te gaeve.

Nao vanaovend geit ut "Vastenaovesblood" ech sjtruime. De sjwoeng zit der good in dus laot de vastenaovend maar komme. Veer daag van lol en plezeer met sjoene pekskes en geschminkte gezichte. Ein ech Limburgse traditie die weej in Peel en Maas koestere.

Ôzze dank geit oet aan ut voltallige besjtuur, aan Joepie, de vriewilligers en de ongenemers van Kessel.

Belaef vastenaovend! Alaaf Alaaf Alaaf.

Wilma Delissen-van Tongerlo
Burgemeister van Peel en Maas



MANNEWERK

Nao un korte retraiteperiode, is ut hiërekwintet Mannewerk oet Kessel weer relatief hel aan de sjlaag gegaon met ut opbouwe van niej repertoire. De nieje samenstelling van het acapellakwintet (Emiel Sillen Hans Koman Mart van Knippenberg Sjors Fassotte en Peter Bouten) haet de gemiddelde laeftiëd met 2 maondj doon kelderen en haet nieje impulsen en elan gegaeve aan de manne.

Der wuurd volop gerepeteerd in de diverse hoëskamers, keukens, bergingen en moërkasten, met as resultaat un programma met aoje, gerestylde, succesvolle nummers en niej repertoire. Naeve de doelsjtelling om regelmaotig, mer neet ál te regelmaotig (gezeen de laeftiëd) op te traeje, is un anger neet onbelangriëk doel geformuleerd: we haoje elkaar nauwlettend in de gate om te veurkomme det ós liedteksten ontaarden in gezeur, melancholisch gelamenteer of zelfmedelijden; met anger weurd: we blieve ós jónger veurdoon den we zien!

LIMBURGS VOLKSLIED DOOR MANNEWERK

Waar in 't bronsgroen eikenhout
't Nachtegaaltje zingt
Over 't malse korenveld
't Lied des leeuweriks klinkt
Waar de hoorn des herders schalt
Langs der beekjes boord

Refrein:

Daar is mijn Vaderland Limburgs dierbaar oord!
Daar is mijn Vaderland Limburgs dierbaar oord!

Waar de brede stroom der Maas
Statig zeewaarts vloeit
Weeldrig sappig veldgewas
Kostelijk groeit en bloeit
Bloemengaard en beemd en bos
Overheerlijk gloort

Waar der vaaderen schone taal
Klinkt met heldere kracht
Waar men kloek en fier van aard
Vreemde praal veracht
Eigen zeden, eigen schoon
't Hart des volks bekoort

Waar aan 't oud Oranjehuis
't Volk blijft hou en trouw
Met ons roemrijk Nederland
Één in vreugd en rouw
Trouw aan plicht en trouw aan God
Heerst van Zuid tot Noord

A photograph of two men celebrating. The man on the left, wearing glasses and a blue blazer over a patterned shirt, holds a large, ornate trophy. The man on the right, wearing a dark jacket, has a wide, enthusiastic smile. The background is dark with some stage lights. The image is overlaid with a colorful graphic design featuring musical notes, a treble clef, and various colored circles (red, green, yellow, purple) on a dark background.

DE GELIËNDE

WINNAARS LVK 2017

Es d'r in Limburg ein podium is veur nuuje dialekleedjes dan is dat waal 't LVK. Wo anger initiatieve dèks lestig van de grond kómme of sjnel blieve sjtaeke is 't LVK dé constante factor. Logisch dat sjrieversj en zengersj van dialekleedjes – gevestigde orde én nuuj talent – 't LVK-podium opzeuke om hun nuujtste vondste aan 't publiek te presentere.

Wils te weite wat 't LVK veur tekstdichtersj, componiste en artieste beteikent? Probeer mer 'ns zónger LVK dien nuuje leedje te “plugge” en tot 'n sukses te make bie 'n groat publiek. Probeer mer 'ns zónger LVK es arties 'n hauf oer mèt eige repertoire 'ne zaal aan dich te binge. Dat is bès lestig! Meh gefilterd door de trechter van 't LVK bereike nuuje vastelaovesleedjes 't volk. En door al die jaore kènt dat volk 't LVK, de leedjes en de artieste.

Hoag buim vange vääol wind, een gevleugelde oetdrökking. Bie een evenement mèt zoavääol omvang en sukses huèrt altied get discussie, gesjtechel en kritiek.

Meh nao 42 jaor sjteit 't fundament ónger 't LVK nog sjteeds es 'n hoes!

't Volk besjlis,'n anger gevleugelde oetdrökking. Bie 't bepale van de winnaar is dat mer gedeiltelek waar, want in de puntetelling höbbe versjillende jury's 'ne vinger in de pap. Meh oeteinelek bliek 't gezègke toch te kloppe: welk leedje tijdens de vastelaovend 't meiste en helste weurt mètgezóng, dat weurt door 't volk besjlis!

Veer es Geliënde zin gruètsj en dankbaar dat veer op 't LVK-podium 16 kièr höbbe maoge optraeje. Veer wunsje alle collega-artieste die ouch op dat podium maoge optraeje of dat mèt enthousiasme naostrjeve vääol sukses!

De Geliënde

Maurice & Roger



01

TEKSTSJRIEVER(S):

GUUS STEINEN, NICO HEUVELMANS

COMPONIST(E):

GUUS STEINEN, MICHEL NITA

OETVEURENDE(N):

PRINS-ROAD SCHAESBERG

INNE SJUNNE RUK

D'R SJEET

Intro:

Sjun gezichter gieët 't vööl, mar ich vroag mich aaf zoe noe en dan
Woarom dat inne sjunne ruk, nit sjun zieë kan.....

Refrein:

Bohhhh wat has doe inne sjunne ruk
Zoene sjunne ruk, ziet me nit zoë duk
Ich vroag mich aaf, noen went ich diene ruk zoë zien
Wie sjun mots doe in godsnaam nit va vuure zieë?
Bohhhh, wat has doe inne sjunne ruk, nea doa zal 't nit aa ligke
Mar loat mich wenn ich dich dalik van vuure zien
Toch estebleef nit sjrikke
Angejs is 't mit dat sjuns dat kin ontsjtoa
Dan och direk alwer gedoa

Couplet 1:

't Orkes dat woar ant spieële en doe wits wahl wie dat geet
Inne rupt dan "Polonaise", waobei dan die rij ontsjteet
Op zich is dat eenvoudig, want dea vuur dich geet vuurop
En doe leks dich dan dieng heng, beij dem aan waers zie van der kop
Joa doa gees te!! joa doa gunt ver!! polonaise!! hoempapa!!
Mar woa kieks doe dan al dea tied va hinge teage aa?

Couplet 2:

Joa 't woar heij in de wieëtsjaf, en vieër
Sjtonge aan de tieëk
En doe zoots doa op 'n kruk, mar diene ruk
Brach mich van sjtreëk
Han zelde zoene sjunne ruk gezieë wie dea
Van dich
Mar ich zoog alling dea ruk, en dus nog graat
Nit die gezich
Ich han toen, get gefluusterd, gans
Romantisch in die oeër
Toen drieëndes doe dich um, ich zag:
"Ich gon, adieë, bonjour!"
Mar toen reeps doe nog get woa ich roeët
Van woeët..
Doe reeps dat ich dich d'r ruk op koeët.....!!!



02

TEKSTSJRIEVER(S):

GUUS STEINEN

COMPONIST(E):

RONALD CLAESSENS

OETVEURENDE(N):

PASCAL SUTHERLAND

DE LEUKSTE VROULUJ ZITTE IN DE HEL

DOONDER

Intro:

Ich haw lets 'nen druim, en dae ging euver de hel
Mer dae waar zo leuk dat ich 'm noe toch gaer aan uch vertel
Dus let 'ns op wie dat 't in die nach gegange haet
Inens sjteit dao d'n duuvel.... en wat meinste wat dae zaet:

Refrein:

De leukste vrouluuj die zitte in de hël, (in de hël....!??)
Die is 't dao boave in d'n hemel vâöls te sjtil (vâölste sjtil !??)
't is aan al die leuke maedjes neet gegaeve
Om tot in eeuwigheid daobaove braaf te laeve
Want wètste wat die doon de gansen daag...???
.....Al wat ondeugend is en eigelik neet maag

Couplet 1:

De hemel?? - zag d'n duuvel - haet de naam, ja dae is bekënd
Mer auch de hel is neet verkeerd, lekker werm, de kachel brent...
En noe met vastelaovend geit 't extra heit d'raan toe
Vol vuur wurd dao gesjoenkeld daag en nach ja dus auch noe
Nae, korter bie 't vuur kenste neet komme - nou mich tunks -
Terwielste ste hie auch nog de leukste maedjes taeghe kums kom mer 'ns met

Couplet 2:

Duvels beer!! wurd dao gebroewe, dat wurd constant rondjgebrach
"En 't vuur.....?? is om te barbecuewe" haet 'r mich gezag
't Geuf dus in de hel neet allein water mèt get brood
Intaegendeil: 't laeve dao dat is verduuvels good.....
Ze gaon dao allenej veur vastelaovend door 't vuur
En dat kump in den hemel -denk ich- nae toch ech
Neet veur en daobie kump

Brök:

En dae sjpreuk van op daen tegel: "in de hemel is gein beer!!"
Geuf dat duuvelse dilemma: wil ich dao dan ech waal haer..?
Ich heur ze dao al vraoge: "moste nog get appelsap?"
En ich sjtaon dan te zeuke "wao 's in godsnaam hie de tap!!!

Outro:

Noe weit ich achteraaft, dat 't zo wiet neet kump...want ich haw...
Ich haw....., ich haw....'t allenej gedruimp!!!



03

TEKSTSJRIEVER(S):

MARJO KOONINGS, TAMARA KOONINGS

COMONIST(E):

STEF KOONINGS, TAMARA KOONINGS

OETVEURENDE(N):

PRUÛF MÁR

ÓP WEG NOR MAERGE

VENROJ

Refrein:

Òp weg nor maerge
Belaeve weejen 'n vlucht vandaag
'n Briesje Vastelaovend
Zelfs d'n taegewiend ruupt: Alaaf!
Òp weg nor maerge:
Belaeve weejen, urst vandaag!
Ooo, Ooo

Couplet 1:

Ik háng hiër ien de lòcht
Tusse Hemel & Vastelaovend
Ik vuul meejen ennen Engel
Verlángend nor Vastelaovesgrond
Dur 't geluud van de stilte
Ontstaon kleure die meejen behage
Ráp nor beneejen
Wiendkrácht 11 waejen meejen terug waar ik stoond
'ne Lòchtbelòn vol konfettie vliègt òs dur tot de zòn wer gòt brànde
Zwevend ien gedaachte, beslute weejen toch már efkes te lánden

Couplet 2:

Nó zò'nne räästige vlucht
Kumt d'n düvel ien meejen nor baove
Ik stook 't vuurke òp
Mit wat broons-gruün-eikehout
De meziek knált dur de wolke
De störm gòt nòw beginne
De stilte is gewist
De turbelensie dén vuult zò vertrowd
'ne Lòchtbelòn vol konfettie vliègt òs dur tot de zòn wer gòt brànde
Zwevend ien gedaachte, beslute weejen toch már efkes te lánden

Brök:

As de daag vliège net zoeëas weejen,
Tikt d'n tied duk án òs neus vurbeejen
Mit de raoze wolk van maerge ien 't verschièt
Is 't zaak dat geejen urst vandaag genièt



04

TEKSTSJRIEVER(S):

PIM VAN WYLUCK

COMONIST(E):

JEROME LENDERS, PIM VAN WYLUCK

OETVEURENDE(N):

PIM VAN WYLUCK

WEEJ KLEURE DE WAERELD

KESSEL

Refrein:

Kleur de weareld, leaf vandaag en leaf ut leave
Asse ens wis wie sjiek dit is, zou su der alles veur geave
Kiek wat hiej gebeurt, as vastelaovend kleurt
Geluif mich ierlijk waar, nog in gen doëzend jaor, bin ik hiej met klaor
Weej kleure de weareld (ohohohh)
Weej kleure de weareld (ohohohh)

Couplet 1:

Kiek ens um dich hear doezende miense allemaal anders
En zoe as ut huurt, steit hiej idderein door elkaar
Al bis su wit of zwart gebaore, klein of groët gewaore
Idderein eave gek, noow luuster good nao wat ik zegk!

Couplet 2:

Kiek ens um dich hear doëzende miense allemaal anders
En wat su zuus, net ein sjilderiej
Ut zien net bonte bleujende bloome, allemaal oetgekomen
Straolend nao de zon, ik woej det dit veur altied kon!

Brök:

En wets su ut maakt neet oet
Welke kleur su hebs op dien snoet
Ut mooiste aan dich, det is..
Det is dien gezicht!



05

TEKSTSJRIEVER(S): NIEK DIRKX, JOS WACKERS
COMPONIST(E): JO HUIJNEN, NIEK DIRKX
OETVEURENDE(N): SPIK EN SPAN

BLIEVE!

ZÖSTERE

Refrein:

Ouch al zeen os glazer laeg
En ouch al mot ich noe op waeg
Ich wil blieve, ich wil blieve
En ouch al wurt hiej de confetti
Door de boetedeur gevaeg
Ich wil blieve, laot mich blieve
Hiej venaovend
Hiej bieje dich

Couplet 1:

Wat woor het vét venaovend
Mer de aovend waerde nach
Zonne vastelaovend-aovend
Geit ummer sjneller den gedach
De trômme, träöte zjwiege
En de lampe pitsje aan
Mer ich wil nog get blieve
Wil nog lang neet hiej vandaan
Ich höb nog tied, mer de klok haef besjlis
Det dit veur os het einde is

Couplet 2:

Eine sjlaag, de deur vlug aoep
Tis os zaate hermenie
Die gaon nog lang neet sjlaope
Pikke nog get nach d'r bieje...
De trômme, träöte klinke
En 't kefee geit vol d'r aan
Kom gaef os nog get drênke
Ich wil nog lang neet hiej vandaan
Het is waal tied, mer dees kepel hef besjlis
Det dit nog neet het einde is

Brök:

Totdesjterreaandehemelindevastelaovesmörgesamesjlaopegaon
Wil ich hiej zeen
Totdetrômmeendeträötevanoszaatehermeniekehiejnaoboetegaon
Wil ich d'r bieje zeen



06

TEKSTSJRIEVER(S):

ROBERT BUCKX

COMONIST(E):

GUUS KITZEN, ROBERT BUCKX

OETVEURENDE(N):

KARTOESJ

DE KLAPTOESJ!

LÖMMERIG

Refrein:

Mit de klaptoesj, van Kartoesj
Kénste neit sjtil blieve sjtoan
Mit de klaptoesj, van Kartoesj
Geiste altied vlotter sjloan
Dat ként sjneller – dat geit sjéller
Dat moag héller – dat ként feller, 1,2,3
Mit de klaptoesj, van Kartoesj
Kénste neit sjtil blieve sjtoan
Mit de klaptoesj, van Kartoesj
Sjleiste altied de richtige toon!

Couplet 1:

Höb v'r mit die daag, niks te vertaere
Dan verkleije v'r ós, es baedelaere
Ongerein höbbe veer de grootste sjpas
Trök nao de basis goan kump ós noe good van pas
Mit geine nagel aan ós vót, zeen weer aevengood hael riek
Make v'r ós eige instrément, jao dan höb v'r oose meziek
Aes vawwe – noe vawwe – gank vawwe – jao vawwe
Noa 't vawwe – dan hawwe – dan hawwe – oppe klawwe!!

Couplet 2:

Zek, waat doon v'r zónger die klamotte
Instrémente koupe, is van de zotte
Allemaal same goan v'r aan de slaag
Mit ein sjtök kartón, sjpaar v'r ós ein groot bedraag
Oos plezeer broesj mit talent, brungk eine Limburgse trent
Maak de klaptoesj van Kartoesj, want dae kos dich geine cent

Brök:

'T geklatsj van dae klaptoesj heure v'r zao gaere
Dan goan v'r same hie in Limburg door de geluidsbarjaere!!!



07

TEKSTSJRIEVER(S):

BAS KELTJENS

COMPONIST(E):

MARK VAN MULLEKOM

OETVEURENDE(N):

MARLEEN RUTTEN

DEZE NACH!

HUNSEL

Refrein:

Deze nach.... Is te kort óm te slaope
Hae liktj nog wagewied aope
Wae 'welteruste' noeit
Deze nach... Is te kort óm te slaope
De vastelaovendj blijftj aope
Slaope kumtj oeit

Couplet 1:

Woea ederein de nachsjicht dreijt
En in de 'laot mer gaon'standj sjteit
Dao geit de vastelaovendj oet zien plaat... ohoho
Woea geine eine heives geit
De klok finaal de plank mis sleit
Dao stoppe wae de wiezers vreug of laat
Want witse waat?

Couplet 2:

Woea vastelaovesveur ontwaaktj
Veur laeveslang verhaole maaktj
Dao heet de tied vandaag gein vat op os... ohoho
Woea ederein de leedjes kwaaktj
Neet oet-gesjaelewazeltj raaktj
Dao laote wae de sloetingstied noe los
As det ins kos!

Brök:

Waers dich noeit vastelaovesmeug?
Det is neet erg mier murgevreug!
Want weem d'r lang genog op wach
Dae zuut vanzelf waal weer de nach!



08

TEKSTSJRIEVER(S):

BAS KELTJENS

COMPONIST(E):

BART STORCKEN

OETVEURENDE(N):

HOONDERVEL

WELTERUSTE WAERELDJ

HALE

Refrein:

Welteruste waereldj
Wae gaon nog efkes door
Ut ritme van de vastelaovend
Kiektj neet op ein oor
Welteruste waereldj
Wae zeen nog lang neet thoes
Wae hōbbe omgedreijde heimwee
Kinne neet nao hoes
Wae zeen de aller-biste, litste, langste
Laatste, van dit oor
Welteruste waereldj, welteruste waereldj
Welteruste waereldj
Wae gaon nog efkes door

Couplet 1:

Spektakel mich, kakel mich, confetti mich knoearhel
Werrem mich, omerrem mich, bring mich hoondervel
Sjouwer aan sjouwer aan sjouwer mich
Sjouwer mich as ich verslap
Sjuuf mich en duuj mich den truuk nao de tap

Couplet 2:

Onnuëzel mich, duuzel mich, razel mich nog ins
Sjoenkel mich, foenkel mich, raak mich esse kins
Sjtraevel en sjroevel en sjravel mich
Sjleiptouw mich den d'r door haer
Wengske aan wengske, waer of gein waer

Brök:

In de naam van de fiësttent
van de vader op de zoon
Vastelaovendj mosse veule
Vastelaovendj mosse doon



09

TEKSTSJRIEVER(S): DWAYNE HORBAG
COMONIST(E): DWAYNE HORBAG
OETVEURENDE(N): FIORENZA

DRIE DAAG OET DE PLAAT

VALKEBERG

Refrein:

Van 's murgens vreug tot 's aoves laat
Goon veer op paad, sjleet mer aan dat vaat
Uh fees van ongekend formaat, dat vastelaovend maakt
Drie daag oet de plaat
Jaalalalalalaa
Jalalajlalaa
Jalalajlalaa
Jaalalalalalaa
Jalalajlalaalalaa
(Jalalalalaa)

Couplet 1:

Hotse van hung, mer hubse toch unne kater?
Dit leedje bringt alles biejein
Dat dit te gek weurt veul ich aan mie water
Want ich bin der feeskapitein
Ich zit mit raod, gael en greun mien paraaf
Ut daak geet hiej der aaf!

Couplet 2:

Der prins laot gein sjteekje mier valle
Zelfs de panne die goon oet ut daak
De blauwe kinne dit neet verknalle
Der sjlechste sjutter dae haet um geraak
Gein sjtopleeg sjprink noe nog op sjtop
De tent geet op der kop!



SCORETABEL

42^e FINALE LVK 2018



IN VOLGORDE VAN OPTRAEJE:		HOOFDJURY LVK	JURY LVK AOD FINALISTE	JURY ZAATE HERMENIEKES	JURY VASTELAOVESWAEREELD	SMS/TILLEFOON	TOTAAL	PLAATS
		JURY 1	JURY 2	JURY 3	JURY 4	JURY 5	PNT	
01.	Inne Sjunne Ruk							
02.	De leukste vrouluuj zitte in de hel							
03.	Òp weg nor maerge							
04.	Weej kleure de waereld							
05.	Blieve!							
06.	De Klaptoesj!							
07.	Deze Nach!							
08.	Welteruste Waereldj							
09.	Drie daag oet de plaat							
10.	Is 't 'm noe, of is 't 'm neet ?							

MAXIMAAL AANTAL PUNTE PER JURY: 16

SCORETABEL

42^e FINALE LVK 2018



		HOOFDJURY LVK	JURY LVK AOD FINALISTE	JURY ZAATE HERMENIEKES	JURY VASTELAOVESWAEREELD	SMS/TILLEFOON	TOTAAL	PLAATS
IN VOLGORDE VAN OPTRAEJE:	PLAATS:	JURY 1	JURY 2	JURY 3	JURY 4	JURY 5	PNT	
11. Droeëme mit de oeëge oop	Venroj							
12. Maa Maa Maa Maa	Meersje							
13. Noe of nooit	Zumpelveld							
14. Is hei 'ne dokter in d'r zaal	Heële							
15. Veer moge weer (daag en nach)	Mofert							
16. Ach, dân zien we vânde straot aaf !!!	Grevors							
17. 't Lempke van de Keulkas	Naer							
18. De tied vaan us leve!	Mestreech							
19. Vastelaovundj Bubbel	Wieërt							
20. Mörge weer	Hael							

BIJ GELIEKE SCORE WUURD GEKEKE NAO DE OETSJLAAG VAN DE HOOFDJURY



10



TEKSTSJRIEVER(S):

GUUS STEINEN

COMPONIST(E):

GUUS STEINEN

OETVEURENDE(N):

DON KIESJOT

IS 'T 'M NOE, OF IS 'T 'M NEET ?

GÖTTEKAOVE



Refrein:

Oooh... ich kaom 't zo gaer aan de weit:

Is 't 'm noe of is 't 'm neet?

Ze zin allemaol gesjmink en verkleid

Is 't 'm noe of is 't 'm neet?

Ach wie gaw kan 'ne minsj zich neet vergisse

En dan denkste... is't... ..is't...? ..is't...? ...is 't 'm noe.....???

Wie dèk me 'n 't mit vastelaovend zaet:

Is 't 'm noe of is 't 'm neet?

Couplet 1:

D'r leep 'ne verkleide van de kroeg nao de frituur

En ich dach..... is 't 'm noe of is 't 'm neet..?

Ich dach dao geit mien broor zo wie dae leep en dat figuur

Toch dach ich..... is 't 'm noe, of is 't 'm neet..?

Ich wou nog sjus "heij sjmaale!!" roope, mer ich heel mich in

Ich dach nog sjus op tied....., verrek zegk... zou 't 'm waal zin?

Mer good auch,jong, 't sjaelde mer 'n haor

Want toen bleek dat 't dae flabbes van hie taegeneuver waar...

Couplet 2:

De prins woort oetgeroope en ich zag taeg mien vrouw...

Ja zegk mich: is 't 'm noe of is 't 'm neet..?

Ich wis namelijk neet of ich de gooje veur mich haw...

Dus ich zag:, is 't 'm noe of is 't 'm neet..?

"Sjat, is dat dae van "dinges" neet, van naeve tante Net"?

En ederein dae bie os sjtòng, dae twiefelde toen met

Mer de kastelein dae zag os toen besjeit

Nae dat is dae dae alzelaeve hie es lètste heivesj geit...!!

Brök:

Is dit miene pils..? ...is emes dae mich dat zaet...?

Is 't 'm noe..?

Ich zeuk de prins oet mien druime, op 't witte paerd..

Is 't 'm noe..?

Outro:

Dus wao 't om geit.... wao zich alles om drejt....

Is 't 'm noe of is 't 'm neet!!!



11

TEKSTSJRIEVER(S): ROEL COMMANS, LEON AARTS

COMONIST(E): ROEL COMMANS, JULES REIVERS

OETVEURENDE(N): BJORN & MIEKE

DROEËME MIT DE OEËGE OOP

VENROJ

Refrein:

Dan kunne we droeëme, droeëme mit de oeëge oop
Vier 't laeve, màk 't waor, vastelaovend, gènne slaop

Couplet 1:

Sluut òw oeëge
Volg òw droeëme
Onder ut wake van de maon
Prinse, prinsesse, kroeeëne en vaere
Kiender zien nòw wat ze straks wille werre
En een droeëm laot dat ontstaon
As d'n tied dan stil blijft staon
En mit vastelaovend de loeke ope gaon

Couplet 2:

De stilte gevange, ver weg gezet
Laeve kòm binne, noeëts mèr naor bed
Nòw is ut echt waor
Confetti as parels, raegent op òs
Liefde ien alles, d'n droeëm is begòs
Vur òs nog lang nie klaor
As d'n tied dan stil blijft staon
En mit vastelaovend de loeke ope gaon

Brök:

Màr as ut gedaon is en velt de laeste traon
Dan gräjòjt ut verlange, ut diepste verlange
Nog ieën kieër terug te gaon



12

TEKSTSJRIEVER(S): ARNO CLAESSENS, BRAM VOLDERS, LUC VOLDERS

COMPONIST(E): LUC VOLDERS

OETVEURENDE(N): DE KLOOMP

MAA MAA MAA MAA

MEERSJE

Refrein:

Want gelökkig höbbe veer de Vastelaovond nog
Waor dai te koup dan waor 't drie daag oetverkoch
Dat eerlijke, dat heerlijke, dat hilt os op de bein
Dat machtige, dat prachtige, nei geine krieg oos klein
Want gelökkig höbbe veer de Vastelaovond nog
Dai kump vanzelf, dai vilt dich zwa mèr oet de loch
Dat eerlijke, dat heerlijke, dat hilt os op de bein
Dat machtige, dat prachtige, nei geine krieg os klein

Couplet 1:

Bès veur ein döbbelsje gebore mè de bès gein vief cent weerd
...maa, maa, maa, maa
es dien vrouw weer zjwanger is, mè de bès zelf gestereliseerd
... maa, maa, maa, maa
es dich belasting mos betale, mè de höbs 't neet verdeend
este dien auge ope deis en pesjtwar dich sjus bedeend
Joong dan höbste alle pech, mè toch kump alles good terech
...maa, maa, maa, maa

Couplet 2:

Este höbs van wjèrre zegke, dat dien ex weer is
Getrouwd... maa, maa, maa, maa
Mèt dai laege buurman, déh dich auch de brommer
Haed geklauwt,... maa, maa, maa, maa
Este trots bès op dien kinger, mè ze zitte in de bak
En diene baas dich neet kint misse, mè heer geuf
Dich toch de zak
Joong dan höbste alle pech, mè toch kump alles
Good terech, ... maa, maa, maa, maa

Brök:

Kinste um goon mit die tegesjlaeg, waardeerste
Pas gelök
Dus vier dees daag mèt gans dien hart, ze kome
Nwats mjè trök



13



TEKSTSJRIEVER(S): DWAYNE HORBAG
COMONIST(E): DWAYNE HORBAG
OETVEURENDE(N): SJPRINGLAEVEND

NOE OF NOOIT

ZUMPELVELD

Refrein:

Noe of nooit, goon veer hiej oet os voege sjeure
Jao, Noe of nooit, riete veer alles oet de kas
Noe of nooit, in dees orkaan van bonte kleure
Vandaag geet ut gebeure, barsjt hiej de vastelaovesbom
Os Limburg is noe ein en geer wit zellef wel waarom
(Sub-refrein:)

Jalalaajla, Jalalaajlalalaa

Jalalaajlalalalaa

Jalalaajla, Jalalaajlalalaa

Jalalajlalalajlalalaa

Couplet 1:

Der vate-aansjleter sjteet klaor
En der beerbrouwer hopt zich un blaor
Der vastelaovescoverbandgitaris raakt bieje os de gooie sjaor
Zelfs de kerksjtraot is neet heilig
Veur dit gevoel is nemes veilig
Ut is chaos in de sjtraote, mer gee miensj haet hiej bezjwaor

Couplet 2:

Elke naaister werkt zich oet de naod
Kump mit ut allergaafste pak veur der draod
En der joekskapelledirigent hild ongewild gein maot
Veur dees tweeënseventig oer
Goon veer op vastelaovestour
In ut epicentrum van de lol dat Limburg sjtraole laot

Brök:

Es de klok op dinsdig twelf oer sjeet, versjeint un glinstering
Mer in elke vastelaovestraon sjuilt un herrinerig



14

TEKSTSJRIEVER(S): PAUL MÜNSTERMANN, LEO KEULARTS

COMPONIST(E): PAUL MÜNSTERMANN

OETVEURENDE(N): PAUL & LEO

IS HEI 'NE DOKTER IN D'R ZAAL

HEËLE

Refrein:

Is hei 'ne dokter in d'r zaal?
 Dem heie vier ins geer gesjproake
 Want dat sjun dansmarieke hat
 Ós vasteloaveshat gebroake
 Weë kint bei ós d'r vasteloavesbloodruk meëte?
 Mesjien hat ieëmes hei nog waal ee good resep
 Ee pilke of ee drenksjke, geweun get millesien
 I jieëker bats ing sjpriets en 's angerdaags d'r krankesjien
 Mótte vier geliek noa 't sjpetaal?
 Of lüj, is hei 'ne dokter in d'r zaal?

Couplet 1:

Gister óp 't Prinsebal, gans gekostumeerd en al
 Vool ós doa ee dansmarieke óp
 Höarkes stief nog va d'r lak, bing bekans bis in d'r nak
 En zoe dreipunts heudje óp d'r kop
 Garde sjnoarsjnak óp ing rei, mit kabaal en vöal behei
 Mè doa boave oet klonk ózze sjrei

Couplet 2:

Wie 't meëdje danse gong, en nieks angesj mie besjtong
 Drieënde het en lachde 't noa ós
 Woa dat ech of toch gesjpild, hant vier ós dat igeild
 Wie 't aan ing pirouette begós
 't Eëte va d'r nommedaag drieënt 'ne radsjlaag in d'r maag
 Va zoeë meëdje krie-se ee besjlaag

Brök:

Vier wille 'm vertelle va ós leed
 Dus hoape vier dat heë ós plat versjteet

Dialoog:

P: Lei, zoogse dat? Die keek noa mich!
 L: Puil, neet noa dich, evvel noa mich!
 P: Nè, jóng, noa mich en nit noa dich...
 L: Wiezoeë? Nit noa dich, allich noa mich!

Fine:

Dich of mich dat is toch gans egaal
 Leef lüj, is hei 'ne dokter in d'r zaal?



15

TEKSTSJRIEVER(S): RON ROEMEN
COMPONIST(E): RON ROEMEN
OETVEURENDE(N): LA BAMBA

VEER MOGE WEER (DAAG EN NACH)

MOFERT



Refrein:

Veer moge weer, veer moge weer
't Hèk is vanne dam
Veer moge weer, veer moge weer
Veer staon in vuur en vlam
Daag en nach laot' veer 'm gaon
Lach de zón of lach de maon
Daag en nach loupe veer werrem
Veur 'n kaad glaas beer
Daag en nach knortj oze maag
Höbb' veer hónger nao dees daag
En dan rope veer: Veer moge weer

Couplet 1:

De sjaatser smiltj eweg van 't ieëste läögske ies
De altied-ieëwig twieëdje haet noe d'n ieëste pries
De fómfjaar is kampejoen, die haet de hoeage C geraak
Robert Langdon dae nao 'nne zeuktoch de Da Vinci code kraak
Vastelaovendj is weer hie, des dezelfde euforie

Couplet 2:

't Zèstal sjuutj de vogel aaf want det wintj 't OLS
Doe veuls dich inne hemel oppe top vanne Everest
De duker dae get zeldzams zuutj löp 't water inne móndj
De prins dae oete doeas sprink, raak dae nag oeatj de gróndj?
Vastelaovendj is weer hie, des dezelfde euforie

Brök:

Veer blieve door-, door-, doorgaon, zoealang es 't gezellig blief
Mesjien waal toet d'n haan zich de pupse oete ouge wrief



16

TEKSTSJRIEVER(S):

COMPONIST(E):

OETVEURENDE(N):

RENE VERSCHUEREN

RENE VERSCHUEREN

DE TODDEZÈK

ACH, DÂN ZIEN WE VÂN DE STRAOT AAF!!!

GREVORS

Refrein:

Ach dân zien we vânde straot aaf
We zien wir vânde straot aaf
As-se heej gebaore bis wet-se wât ut is
We zien wir vânde straot aaf
Ach dân zien we vânde straot aaf
We zien wir vânde straot aaf
En idderskiër zônder gemit wil ik toch wiër
Mâr dân is ut alaaf

Couplet 1:

Zeg wât
Duis dich eigelik zoëal de hiëlen daag vraog
Ik mich aaf ut ganse jaor
Blauwbekke met plekke in de bouwloëds de
Pepeermechee is nag ni klaor
Steis-se geis-se pleite staon te stange met
behang is de wage dao
Stress umdes-se wets des-se môs piensele
Jaozeker wies ut letste oor

Vraoge ze is ut druk
Dân zeg ik al te duk

Couplet 2:

Zeg waarom
Zit-se heej elk oor en kump ut mâr ni klaor achter
Dât neijmesjiën
Stôffe kaupe knippe en mâr bliëve hippe um dit
Jaor ut moëjst te zien
Achter en gerdienke snel nag eemus ff sjmienke
Duit gen centje piën
Want zoë helt de vastenaovend vuûlbelaovend
Gans ut zuuje aan de liën

Vraoge ze is ut druk
Dân zeg ik al te duk



17

TEKSTSJRIEVER(S):

BAS KELTJENS

COMONIST(E):

MARK VAN MULLEKOM

OETVEURENDE(N):

ÓM IN TE LIESTE



'T LEMPKE VAN DE KEULKAS

NAER

Refrein:

Want bie ut lempke van de keulkas is nog fieëst

Pak ut keuketrepke, zit dich hiej d'r bie

Den prooste wae mit biste vrunj

Nog ein doorzakkers-runj

Biej ut lempke van de keulkas is nog fieëst

Ohoo..... dao ligge ze toch

Ohoo..... Gekeuldj en genog

Ohoo..... precies waat ich zoch

Biej ut lempke van de keulkas is nog fieëst

Couplet 1:

Huurs doe altied bie die luuj die steeds opnuuj, niks äöverslaon

Die verrekke te vertrekke, auch al is ut ram gedaon

Die taeg baeter weite in, es ut neet kin, toch blieve staon

En nao oerelang bonjoere nog op volle toere gaon

Den weit d'r is noe mier

Biej os thoes gaon wae nog wier, wier, wier

Couplet 2:

Bienao thoes, op waeg nao hoes, want dich höbs al dien bonne op

Merkse nondedjuu op nuuj, det diene dorst neet is gestop

En toet äövermaat van ramp, auch las van kramp en hongerklop

Kammeraad, det kin gein kwaod, koom mit, dao weit ich waal get op

D'r is nog vastelaoveshaop

Trik de keulkas mer ins aop

Brök:

Geluif mer desse lekker slaope zals

Asse mit dien naas in de botter vals



18

TEKSTSJRIEVER(S):

ERIC RECK, CHAREL JEUKEN

COMPONIST(E):

ERIC RECK

OETVEURENDE(N):

KATJA HENZ

DE TIED VAAN US LEVE!

MESTREECH

Refrein :

Veer viere hei, hei, hei, d'n tied vaan us leve
Veer hōbbe hei èch d'n ierste pries, woene in ût paradies
En veer goon hei, hei, hei, èch allès geve
Es ste vaan Limburg bis, daan wèt'ste wat dat is!

Couplet 1:

Zaots diech in de blomkuul, in us Limburgs land?
Jala-lalalala
Daan pak uuch ins allèmaol vas bei de hand
Ja- lalalalala
Veuls diech gekke kriebels en tintelt dien blood?
Jala-lalalala
Iech kin diech belaoove daan zit'ste hei good
Ja-lalalalalala

Couplet 2:

Woens diech op 'n plèk tösse Eijsdè en Mook?
Jala-lalalala
En raak'ste vaan blaosmèziek ram vaan de kook?
Ja-lalalalala
Hèls diech vaan kaw sjootèl en auch vaan zoervleis
Jala-lalalala
Is op asselegoonsdag dien stumkè get heis?
Jalalalala

Brök:

De Bertha, de Jaeger en wee pak d'n Ûm
Die Sjoen aw tradities dao dreijt 't toch um
't Bōlke vaan de tap geit deks op en neer
Veer make heij altied plezeer



19

TEKSTSJRIEVER(S):

MARK BOUWMANS

COMONIST(E):

MARK FONTEIJN

OETVEURENDE(N):

MARK & WILHELMIE

VASTELAOVUNDJ BUBBEL

WIEËRT

Intro:

Ich waer net wakker, pluk de schoeënste daag

En laot 't zönke binne

Aet spek met ei-jer want dét vultj de maag

't Fieëst dét moog beginne

Refrein:

Ich stap lekker in dae bubbel, soonger trubbel, laot ich mich los

Vastelaovendj ('ch) gaef mich döbbel, loester Limburg, dit és van os

Vae laeve in oeës eige wêrreldje, in oeës eige Lu-j Lekker lând

Kom stap lekker in dae bubbel, geneet döbbel, vae gaon now los... dit és van os

Couplet 1:

Ich trek 't gekste pekske uut de kast, de schmeenk keumtj uut 't duuske

Tel vlot de bonne, want dan weit ich vast, ich kom neet druueg te staon

En dan vervang ich 't verlange, weit 't wachte dét és gedaon

Ich kan gepasj de klown uut hânge, now ich weit dét ich moog gaon

Couplet 2:

'n Hând confetti bringtj de straot op kluuër, d'n Optocht és aan't loupe

Dao lachtj 'n masker oppe boeteduueër, ich knik belafdj gedaag

En ich wil zînge, mich bedwînge zal neet lökke, joeksig gedraag

És waat dieës daag plezeer zal brînge, daovan raak ich neet van slaag



20

TEKSTSJRIEVER(S):

HUGO LUIJTEN

COMONIST(E):

HUGO LUIJTEN

OETVEURENDE(N):

DE HAP (HAELDER AOD PRINSE)

MÖRGE WEER

HAEL

Refrein:

Mörge weer, mörge weer, det ich 't nog ens perbeer

Mörge weer, mörge weer, es ich niks versjangeleer

Mörge weer, mörge weer, den gaon ich nog eine keer (of tweeë, of drie, of veer)

Want es ich mich ammezeer, zoealang zèk ich: mörge weer

Couplet 1:

't Waas mèt vastelaovendj, toen zacht mich eine flap:

"De pot is laeg, mien tesse vol, det is waat ich neet sjnap"

Waat zeen det noe vöör grappe? Besjtèl d'r nog ens veer

Ich laot ze nog get lappe, mörge zeen wae den waal weer

Couplet 2:

Lèts zoeag ich eine aoje, dae sjpróng nog oppe kis

Hae kós zich neet mieë haoje en greep toen nao alles mis

"Det waas mer net 'r naeve", zag hae, en sjtóng alweer

'Ich gaon mich nog 'ns gaeve, mörge zeen wae den waal weer'



PUBLIEKSSJTUMME PER SMS OF TILLEFOON

Aug geej kent mei bepaole waem ut LVK 2018 geit winne. De publiekssjtumme telle veur 1/5e deil mei in de eindoetsjlaag. Geej kent mei doon door un sms te sjture of te belle en op drie unieke liedjes te sjtumme.

SMS € 0,70 per sms

SMS NAO **4422**

01. Inne Sjunne Ruk	D'r Sjeet	01
02. De leukste vrouluuj zitte in de hel	Doonder	02
03. Òp weg nor maerge	Venroj	03
04. Weej kleure de waereld	Kessel	04
05. Blieve!	Zöstere	05
06. De Klaptoesj!	Lömmerig	06
07. Deze Nach!	Hunsel	07
08. Welteruste Waereldj	Hale	08
09. Drie daag oet de plaat	Valkeberg	09
10. Is 't 'm noe, of is 't 'm neet ?	Göttekaove	10

TILLEFOON € 0,70 per gesjprek **0909 - 202 70 30**

VEURBEELD SMS:

LVK spatie **01** spatie **02** spatie **03**

Of bel nao 0909 - 202 70 30 en volg de instructies

Geej kent eine kier ug sjtum oetbringe via belle en/of sms

SMS € 0,70 per sms

SMS NAO **4422**

11. Droeëme mit de oeëge oop	Venroj	11
12. Maa Maa Maa Maa	Meersje	12
13. Noe of nooit	Zumpelveld	13
14. Is hei 'ne dokter in d'r zaal	Heële	14
15. Veer moge weer (daag en nach)	Mofert	15
16. Ach, dân zien we vânde straot aaf !!!	Grevors	16
17. 't Lempke van de Keulkas	Naer	17
18. De tied vaan us leve!	Mestreech	18
19. Vastelaovundj Bubbel	Wieërt	19
20. Mörge weer	Hael	20

TILLEFOON € 0,70 per gesjprek **0909 - 202 70 30**

EUVERZICH WINNAARS LIMBURGS VASTELAOVESLEEDJES KONKOER

JAOR	HERKOMS	TITEL	Componist(e)
1977	Mestreech	Vaan Eysde tot de Mookerhei	Jean Innemee
1978	De Ruiver	De zaagte 'Geej'	Jan Theelen
1979	Gelaen	Dan kal ich plat	Ben Erkens en The Country Singers
1980	Zitterd	De beierheering	Hans Wijnands
1981	Remunj	De vastelaovend heurt bie Limburg	Naud Reijners
1982	Göttekaove	Zoa moosj 't kènne blieve	Guus Steinen en John Wauben
1983	Gelaen	Mie Limburgs blood	Ben Erkens
1984	Meersje	Doa moste mèt ljàrre léve	Leon Volders
1985	Gelaen	Hawt 'm vas de vastelaovend	Bert Dijcks
1986	Mestreech	Jao heij in Limburg	Sjef Duchateau
1987	Lin	Wieböle	John Evers
1988	Venlo	Minse wie weej	Giel Aerts
1989	Venlo	De knappe(rikke)	Giel Aerts
1990	Gelaen	Ich tik neet richtig	Ben Erkens
1991	Venlo	Det is ein joekskèpel op joets	Jan Jacobs
1992	Venlo	Waat hebbe we 't toch good	Giel Aerts
1993	Tegele	'nne Late	Peter van den Akker
1994	Venlo	Heej of dao	Giel Aerts
1995	Haors	De ganse santekraom	Thijs Kleeven
1996	Mestreech	Drejje!!	Ursula en Bert Garnier



TEKSTSJRIEVER(S)	OETVEURENDE(N)	FINALEPLAATS
Bert Salden	The Walkers	Gelaen
Arnold Wassen	Lei Driessen	Gelaen
Thijs Arts	Ben Erkens en The Country Singers	Gelaen
Hans Wijnands	Peter Eijkenboom en The Ragtime Band	Gelaen
Naud Reijners	Naud Reijners en Dominique Reijners	Gelaen
Guus Steinen	De Zjweitvuit	Gelaen
Miets Zijlstra-de Loo	Ben Erkens en Kapel 'Roed is Droof'	Gelaen
Leon Volders	Leon Volders	Remunj
Jan Ridderbeekx	Jan Ridderbeekx en The Fratellies	Heëlehei
Sjef Duchateau	Beppie Kraft	Gelaen
Piet Evers	Duo Twee Plus en De Kuulköpkes	Gelaen
Frans Boermans	De Kammeräodjes	Gelaen
Frans Boermans	Wiel Vestjens en Hary Cromptvoets	Gelaen
Miets Zijlstra-de Loo	Ben Erkens	Gelaen
Sef Maaskant	Hay en Paul Peeters	Gulpe
Frans Boermans	Wiel Vestjens en Hary Cromptvoets	Lin
Peter van den Akker	Thei en Marij	Tegele
Giel Aerts	Wiel Vestjens en Hary Cromptvoets	Baek
Cor Kuipers	de Wazelvotte	Roggel
Ursula en Bert Garnier	Duo Ammezasië	Haors aan de Maas

EUVERZICH WINNAARS LIMBURGS VASTELAOVESLEEDJES KONKOER

JAOR	HERKOMS	TITEL	COMPONIST(E):
1997	Venlo	Had ik maar	Sef Gubbels
1998	Ulesjtraote	Opzie, Opzie, Opzie	Gaston Jacobs
1999	Mestreech	Iech höb diech weer gevoonde	Ursula en Bert Garnier
2000	Venlo	Josefien	Wim Roeffen
2001	De Ruiver	Good geammezeerd	Arnold Wassen
2002	Gulpe	Wie d'r Herrgot Limburg had gemaak	Ben Erkens
2003	Venlo	Dèh dan, dao isse	Wim Janssen
2004	Heële	Tweemaol aafgezeëg(en nog te kót)	Paul Münstermann
2005	Bor	Wat zaeter?!	Ben Erkens
2006	Lömmerig	Dat zit bie os in de femilie	Guus Stienen
2007	Grevors	Heej bliëf ik plekke	Rene Verschueren
2008	Venlo	De kriebels	Frans Pollux
2009	Grevors	Ni miër en ni minder	Rene Verschueren
2010	Venlo	Vandaag!	Quinn Warmerdam
2011	Venlo	Kôm 's kiëke beej ôs	Quinn Warmerdam
2012	Venlo	Doot 's gek	Quinn Warmerdam
2013	Mofert	Laef, Limburg laef!	Ron Roemen
2014	Grevors	Onhendig leedje	Rene Verschueren
2015	Zöstere	Es vastelaovend Limburg bënne vèlt	Mark van Mullekom
2016	Zöstere	Kampioene van de Nach	Mark van Mullekom
2017	Hölsberg	Code 'road-gael-greun'	Jos Gijzen

TEKSTSJRIEVER(S)**OETVEURENDE(N)****FINALEPLAATS:**

Frans Boermans	Wiel Vestjens & Hary Crompvoets	Gelaen
Gaston Jacobs	Gaston Jacobs en zien vrunj	Wieërt
Ursula en Bert Garnier	't Merretkoer	Belvend
Wim Roeffen en Frans Boermans	Wiel Vestjens en Gé Deenen	Kirchrao
Arnold Wassen	Dét môt kènne	Neel
Ben Erkens	Frans Croonenberg	Belvend
Peter Jansen	Peter Jansen & Wim Janssen	Zitterd
Paul Münstermann en Leo Keularts	Paul en Leo	Berg
Paul Heffels - Frank Dullens - Ben Erkens	Böshuuske Ontsjpannings Vereiniging	Venroj
Guus Stienen	Kartoesj	Stein
Rene Verschueren	De Toddezèk	Neel
Frans Pollux	Bram Holla & Ruud Stikkelbroeck	Zaerum
Rene Verschueren	De Toddezèk	Gelaen
Quinn Warmerdam	W-Dreej	Toear
Hannelore Winter	W-Dreej	Kepel
Quinn Warmerdam	W-Dreej	Mergraote
Ron Roemen	La Bamba	Neel
Rene Verschueren	De Toddezèk	Grevors
Bas Keltjens	Spik en Span	Kirchrao
Bas Keltjens	Spik en Span	Venroj
Maurice Pluijmakers	De Geliënde	Heële



Sponsors van Stichting LVK Kessel

ArenaLease
In goede handen.



praedé



mertens



personato
wij vinden.



Vrunj van ut LVK



MEDIAKRACHT
STRATEGIE / ONTWERP / ONLINE



Saroleastraat 4, Heerlen



Besjtuur Stichting LVK

Ut besjtuur besjteit oet (vlnr):

Erik Brouns, Zjwame

Jan Volleberg, Mestreech

Elise van Wordragen, Helje

Joep Verbugt, Helje

Brigitte van Eck, Wieërt

Jos Cremers, Gelaen

Ron Aspers, De Ruiver

John Habets, Broensem

Neet oppe foto: Stan Spauwen, Éésjde

Hoofdsponsors Finale LVK

